

Inatsisissatut siunnersuummut oqaaseqaatit
Oqaaseqaatit nalinginnaasut

1. Inatsimmi siunertaq

a. Inatsisissatut siunnersuummut qulliunerusumik tunuliaqut

Inatsisissammut tunuliaqutaavoq akiliuteqarluni aalisarnermit aningaasatigut pissarsianik pitsaanerpaanngortitsiniarneq pillugu nalunaarusiaq, marts 2009-mi uumassusilinnik isumalluutinik naleqarnerulersitsineq pillugu Aalisarnermut, Piniarnermut Nunalerinermullu Naalackersuisoqarfimmi Suleqatigiissitamit tunniunneqartoq.

Suleqatigiissitaliaq Aalisarnermut, Piniarnermut Nunalerinermullu Naalackersuisumit pilersinneqarpoq, tassanilu peqataapput Inuussutissarsiornermut Suliffeqarnermullu Naalackersuisoqarfik, Kalaallit Nunaanni Takornariatitsinermit Inuussutissarsiornermullu Siunnersuisoqatigiit, Kalaallit Nunaanni Aalisarsinnaanermut Akuersissutinik Nakkutilliisoqarfik, KNAPK aamma KANUKOKA. Inuiaqatigiit eqalunnit pissarsiaasa pitsaanerpaanngortinneqarnissaannut periarfissat nalunaarusiami eqqartorneqarput.

Nalunaarusiaq qulaani taaneqartoq tunngavigalugu inatsisissatut siunnersuut suliarineqarpoq.

Nalunaarusiami nunani allani kapisilinniarluni sukisaarsaatigalugu aalisarnermut arlalinnut sanilliussisoqarpoq tassanilu ilaatigut oqaatigineqarsinnaavoq, kapisilimmit sinerissamut qanittumi inuussutissarsiorluni aalisarnermit qassutinik pisarineqarsimasumut sanilliullugu sukisaarsaatigalugu qissattarluni kapisilik pisarineqartoq 70-eriaammik naleqarnerusartoq. Taamatuttaaq eqaluup qissattaammik pisarineqartup eqalummut qassutinik pisarineqartumut sanilliullugu nalinga qaffasinnerungaarpoq. Inatsit sukisaarsaatigalugu aalisarnermik sinaakkusiisoq eqalunnik sukisaarsaatigalugu pisarineqartunik naleqarnerulersitsinermit tapersiissaaq.

Najukkani angalatitsisartut arlallit nunami allamiunik takornarianik sukisaarsaatigalugu aalisartitsisarlutik maannakkut aallartereernikuupput, taamaalillutillu maannakkungaaq malunnaatilimmik aningaasanik kaaviiartitsisalereernikuullutik.

Ineriartornerup taamaattup ikorfartorneqarnissaa taakkulu takornariatitsinermit sullississutaat siunissamut qulakkeerinniffiginissaat inatsisissatut siunnersuummi uani siunertaaavoq. Aammattaaq assersuutigalugu savaateqarfimmi saniatigooralugu takornariatitsiviusartumi isertitaqarnissaa aammalu akuersissummik pissarsinikkut kuummi akuersissuteqarfiusumi

qanittumiittumi aalisarsinnaanermut akuersissutinik tunisaqartarnikkut saniatigut isertitaqarnissaq inatsisikkut periarfissinneqassaaq.

Kalaallit Nunaanni kuuit ilaat eqalunnik (salvelinus alpinus) sukisaarsaatigalugu aalisarfigineqarnissaminnut periarfissarissaartitsilluarput. Ilaatigut Danmarkimi inuussutissarsiutigalugu aalisarnermik aqqissuisartut ersarissamik oqaatigaat sukisaarsaatigalugu aalisarnerq pilerinarluartoq pineqartoq.

Aalisartut nunanit allaneersut akiliillutik angalasut kuummut pigaangamik aalisartunik allanik nunanit allaneersunik takkuttoqariataarnerani suliniutit ajornartorsiutinik qaangiissutaasinnaasut takornariartitsinermik inuussutissarsiortut piffissami sivisuumi ujartornikuuaat. Taamaalilluni angalanermik aqqissuussineq immikkuullarissuujunnaartarpoq, taamaalillunilu aqqissuisup aqqissuinermini qaffasinnerusumik akeqartitsinissaa kingusinerusukkullu sukisaarsaatigalugu aalisartunik nunanit allanersuunik immaqqa immikkuullarissuunnginneranik tusagaqarsimanerat pissutigalugu sullissaqarniarnera ajornakusuulersarpoq.

Nunap immikkoortuinik ineriartortitsinissamut periutsimi RUS-imi anguniagaavoq, innuttaasunut Kalaallit Nunaata immikkoortortaani najugalinnut pitsaanerusunik inuussutissarsiutitigut periarfissanik pilersitsinissaq. Taamatut periuseqarneq kuunnut atuisinnaatitaanerup eqqunneqarnerata tapersersorpaa, tassami pitsaasumik takornarianut tunisassiamik pilersitsilluni najukkani inuiaqatigiinni sukisaarsaatigalugu aalisarluni takornariartitsiviusartuni innuttaasunut pitsaasumik aningaasanik kaaviiartitsinissaq suliffissanillu pilersitsinissaq atuisinnaatitaanerup eqqunneqarnerani piffissamut sivisuumut anguniagaammat.

Nunani allani misilittakkat takutippaat, qangaaniilli nalinginnaasumik piniarnermik aalisarnermillu inuussutissarsiortermeri suliffeqarnikuusimasut sukisaarsaatigalugu aalisarluni takornariartitsinermut atatillugu suliffittaartarnissamut periarfissarissaartartut. Tamakku assersuutigalugu tassaasinnaapput akuersissutinik pigisaqartut imaluunniit sukisaarsaatigalugu aalisariarlutik takornarianik aalisarfiusartunut angallassisartut imaluunniit aalisariarluni tammaarsimaarfinni najukkami aalisartitsisartut.

Sukisaarsaatigalugu aalisartut nunanit allaneersut nunami namminermeri aalisarsinnaanermut akuersissummik pissarsisut killeqanngitsumik aalisarsinnaanerat pillugu malittarisassap pingaernerup nalinginnaasup atorneqannginnissaanik siunnersuut kinguneqarmat, aalajangersakkat taamatut pisinnaatitaaffimmik atorunnaartitsisut ersarissumik inatsisinilu oqaasertalersornissaat pisariaqarpoq.

Inuit Kalaallit Nunaanni aalajangersimasumik najugaqanngitsut aalisarsinnaanermillu akuersissummik pissarsisut pillugit inuussutissarsiutigalugu nalinginnaasumik

aalisarsinnaanerannik, takuuk aalisarnej pillugu inatsimmi § 8, imm. 3, inatsisissatut siunnersuummi immikkoortoq pingaerneq saneqqutsineruvoq.

Kuummik akuersissuteqarnerup pitsaaqutigaa suliffeqarfiup akiliisitsilluni sukisaarsaatigalugu aalisartunik takornariartitsisup takornarissanik nunanit allaneersunik allanik kuummi naammattuериатаarsinnaanginnera. Taamaalilluni sukisaarsaatigalugu aalisarnej immikkuullarinnerulissaaq pitsaanerusumillu misigisaqarfiussalluni. Inuit Kalaallit Nunaanni angerlarsimaffeqartut kuummi aalisarnissamut sulii periarfissaqassapput.

Akuersissummik pigisaqartup pisinnaatitaaffii pisussaaffiilu akuersissummik piginnittumut pineqartumut Naalakkersuisut akuersissuteqarnej pillugu nalunaarutaanni annertunerusumik aalajangersarneqassapput.

Kuunnut akuersissuteqartarnerup atuutilersinneqarneratigut angalanermik aaqqissuisut pitsaanerusunik neqerooruteqarsinnaalissapput. Angallassinernik aaqqissuisartut akornanni sukisaarsaatigalugu aalisarnermik aaqqissuussinermi maannakkut annertuunik aningaasanik kaaviaartitsisoqalereernikuuvoq. Ukiumi siullermi akuersissutit qanoq amerlatigisut tunniunneqarnissaat nalorninarpoq, ilimagineqarporli ukiut arlallit ingerlaneranni kuuit akuersissuteqaataasinnaasut amerlanerpaaffissaat tamakkerlugit akuersissutinik tunniussisoqassasoq.

b. Inatsisissamik piareersaalluni sulineq.

Ataatsimiititaliami inatsisissamik piareersaasumi inatsisissatut siunnersuut suliarineqarnikuunnigilaq, kisiannili akiliuteqarluni aalisarnermit aningaasatigut pissarsianik pitsaanerpaangortitsiniarneq pillugu nalunaarusiaq, marts 2009-mi tunniunneqartoq toqqaannartumik tunngavigalugu suliarineqarpoq.

c. Inatsisissatut siunnersuutip ataatsimut isigalugu imarisai.

Inatsisip pingaarnertut imarisaa tassaavoq kuummut eqaloqarfimmut akuersissummik tunniussisinnaanermik Naalakkersuisut pisinnaatinneqalernerat, taamaalilluni akuersissummik pigisaqartut sukisaarsaatigalugu aalisarlutik takornarissanut Kalaallit Nunaanni najugaqanngitsunut kisermaassillutik neqerooruteqarsinnaalerput. Akuersissummik tunniussineq taamaalilluni Kalaallit Nunaanni aalajangersimasumik najugaqartut inuussutissarsiutigalugu aalisarsinnaanerannut aallaaviusumik sunniuteqassanngilaq.

Kuunnik akuersissuteqarfiussanik naleqquttunik qanoq iliorluni toqqaanissaaq taassumalu kingorna akuersissuteqarfigineqarnissamik qinnuteqartunut inuit ataasiakkaajusinnaasunut suliffeqarfiussinnaasunulluunniit qanoq iliorluni akuersissummik tunniussisoqarsinnaanera inatsimmi annertunerusumik allaaserineqarput.

2. Siunnersuutip imarisai.

a. Inatsisit atuuttut.

Inunnut nunanit allanneersunut ukiuni marlunni Kalaallit Nunaanni aalajangersimasumik najugaqarsimangitsunut imaluunniit danskit naalagaaffianni innuttaasunut Kalaallit Nunaanni aalajangersimasumik najugaqanngitsunut nunami kuunni aalisartussanut taamaallaat nunami namminermit atuuttunik aalisarsinnaanermut akuersissuteqarnissaq Kalaallit Nunaanni maannamut piumasaqaataanikuuvoq, takuuk aalisarneq pillugu inatsimmi § 8, imm. 3. Maani najugaqartut sukisaarsaatigalugu aalisarnerat aallaaviumik killeqanngilaq. Tamanna aalisarneq pillugu inatsimmi § 8-mi ersippoq.

Eqqissisimatitsineq pillugu aalajangersakkat eqqarsaatigalugit, taakku eqalunniarneq pillugu nalunaarummi nr. 20, 25. August 2005-imeersumi kommunillu ileqqoreqqusaanni takuneqarsinnaapput. Piffissat eqqissisimatitsiviusut pillugit atortullu atorneqarsinnaasut pillugit aalajangersaanikkut eqqissisimatitsineq pisinnaavoq.

b. Siunnersuutip immikkoortui pingaarnert.

Siunnersuummi malittarisassaq nutaaq pingaarneq tassaavoq, kuummi aalajangersimasumi sukisaarsaatigalugu aalisarsinnaatitaaneq maannakkut akuersissutitut pissarsiarineqarsinnaalermat, tassani aalisarneq pillugu inatsimmi § 8, imm. 3 malillugu nunami namminermit atuuttumik aalisarsinnaanermut akuersissummik atuuttumik pissarsigunik Kalaallit Nunaanni inuussutissarsiutigalugu aalisarsinnaanngikkaluartut inunnut sukisaarsaatigalugu aalisarnissamik kisermaassillutik neqerooruteqartoqarsinnaalerlutik. Taamaaliornikkut takornarissat najugaqavissuunngitsut kuummi akuersissutivigineqartumi sukisaarsaatigalugu aalisarsinnaanermut mattunneqanngillat, akuersissummillu piginnittup ullukkaarlugu pineqartulluunniit kissaatigisaa malillugu kuummi sukisaarsaatigalugu aalisarsinnaaneq killeqanngitsumik tuneqqissinnaavaa.

Nunaqavissut kuunni eqaloqarfinni suli aalisarsinnaatitaassapput, taamaallaat piffissat eqqissisimatitsiviusut, atortut atorneqarsinnaasut il.il. eqqarsaatigalugit inatsisip atuuttup kingunerisaanik killilersuisoqarluni. Tamanna eqalunniarneq pillugu nalunaarummi nr. 20, 25. august 2005-imeersumi aamma kommunit peqqussutaanni maannakkut killilersorneqarpoq.

Naliliisoqarpoq innuttaasut Kalaallit Nunaanni aalajangersimasumik najugaqartut sukisaarsaatigalugu aalisarnerup saniatigut suli eqalunniarsinnaasut, aamma kuunni akuersissuteqarfiusuni. Aalisarneq qangali ingerlanneqartoq taamaalilluni kuuft paavanni ingerlanneqarsinnaavoq, sukisaarsaatigalugulu aalisarneq kuunni namminermit ingerlanneqarsinnaalluni.

Inuit Kalaallit Nunaanni nunaqavissut aamma kuunni akuersissuteqarfiusuni qissattarlutik aalisarsinnaanermik periarfissaqarput. Naliliisoqarpoq tamanna annertunerusumik akornutaassanngitsoq, tassa sukisaarsaatigalugu aalisartartut taakku ikitsuinnaammata. Kuunnik akuersissuteqarfiusunik toqqaanermi kuuit inissisimanertik pissutigalugu nunaqavissunit amerlasuunit tikinneqarneq ajortut toqqarniarneqassapput.

Nunaqavissut sulii aalisarsinnaanernik aaqqiineq toqqarneqarpoq aalisarneq sumiiffinni najugaqartunit ukiorpassuarni qangalili ingerlanneqartartoq eqqarsaatigalugu, naliliisoqarmallu sumiiffimmi najugaqartut aalisarnermik ingerlatsiinnaraluarpataluunniit sukisaarsaatigalugu aalisarneq qaffasissumik sulii pitsaassuseqassasoq.

Kuunnilli sumiiffinni najugaqartunit annertunerusumik aalisarfigineqarneq ajortutut paasineqareersimasunik toqqaaniartoqassaaq. Sumiiffinni najugaqartut kuunnik qanoq annertutigisumik atuisarnerat paasiniarniarlugu kommunit sumiiffinni tusarniaasussaatitaanerisigut tamanna malinniarneqarpoq.

Kalaallit Nunaanni inatsiseqarnermi immikkoortoq killilersuiffik nutaaq kisiannili sikumik imermillu atuneq pillugu Inatsisartut inatsisaannut 2001-imeersumut assingusoq pineqarpoq. Inuiqatigiit akuersissutinillu pigisaqartut ataasiakkaat aningaasatigut pissarsinissaat aaqquissuussinermi siunertaavoq. Akuersissutinik tunniussinermut akiliutitit inuiqatigiit akiliummik pissarsissapput. Akuersissummik pigisaqartut akuersissummik pissarsereernerup kingorna akiliutit ilanngaatilugit kuummi aalisarsinnaanermik tunisap akia taassuminngalu pissarsiaat tamarmiusut namminneq aalajangersinnaassavaat.

Kuuit akuersissuteqarfiusut tamarmiusut amerlassusaat killilerneqassaaq, tassa kuuit aalisarfiusinnaasutut toqqarneqartut piukkunnartullu pinngortitamillu pitsaasumik misigisaqarfiusinnaasut akuersissuteqarfigineqarnissaat taamaallaat siunertaammat. Takornarissat nunanit allaneersut nalinginnaasut eqqarsaatigalugit eqalunniarsinnaanermut nunami namminermi attuuttumik akuersissummik pissarsinissaat sulii pingaarnertut malittarisassaassaaq. Kuuit akuersissuteqarfiusut amerlassusissaannik killiliineq akiliuteqarluni aalisarnermit aningaasatigut pissarsianik pitsaanerpaanngortitsiniarneq pillugu nalunaarusiami martsimi 2009-meersumi inassuteqaatigineqarpoq.

Akuersissummik pigisaqartunut ataasiakkaannut akuersissut pillugu Naalakkersuisut nalunaaruteqassapput, tassanilu piumasaqaatit akuersissummik pigisaqartup pisinnaatitaaffimminik pisussaaffimminillu paasisaqarfigisinnaasai aalajangersarneqassallutik.

Takornarissanut nunanit allaneersunut sukisaarsaatigalugu aalisartunut aalisartitsisarnerup siunissami pitsaasumik ineriartortitsinissaata qulakkeerneqarnissaata isiginiarneqarnera takornarissat nunanit allaneersut aalisarsinnaanermut akuersissummik pissarsillutik nunami kuunni nalinginnaasumik eqalunniarsinnaanernit pingaartinneqarneruvoq.

c. Siunnersuummi immikkoortut ataasiakkaat.

§ 1-imi atuuffia pillugu qulequttami Kalaallit Nunaanni sukisaarsaatigalugu aalisarnermut atatillugu taaguut akuersissuteqarneq allaaseralugu inatsisissatut siunnersut aallartippoq. Taassuma kingorna immikkoortumi § 2-mi ”sukisaarsaatigalugu aalisartunik aalisartitsinermut akuersissut”-mi akuersissutip sunik kinguneqarnera annertunerusumik allaaserineqarpoq, § 3-milu Naalakkersuisut akuersissutunik tunniussinissamut pisinnaatinneqarnerat aalajangersarluni.

Taassuma kingorna §§ 4-miit 9-mut immikkoortumi ”akuersissummik pigisaqarnermi piunasaqaatit”-mi akuersissummik pigisaqarnermi minnerpaamik piunasaqaatit ikitsut allaaserineqarput.

§ 10-miit § 14-imut immikkoortumi ”kuunnik akuersissuteqarfiusunik toqqaaneq”-mi kuunnik akuersissuteqarfiusunik toqqaanermi suleriaaseq tunngaviillu allaaserineqarput, aammalu kuuit sorliit kuunnik akuersissuteqarfiusussanik neqeroorutigineqartussanik aalajangiinissamut Naalakkersuit pisinnaatinneqarnerat aalajangersarneqarpoq.

§§15-imiit 21-mut immikkoortumi ”akuersissutunik tunniussineq”-mi akuersissutunik tunniussinermi suleriaaseq tunngaviillu allaaserineqarput. Taakkua pillugit aalajangiinissamut qinnuteqaatillu qinnuteqaatinik suliaqarnertut suliarineqarnissaannik Naalakkersuisut pisinnaatitaaffeqarput.

Aammattaaq § 22-mi akiliisarneq pillugu aalajangersakkanik aammalu §§ 23-miit 26-mut akuersissutip atorunnaarsinneqarnera tunniussinerlu pillugit aalajangersakkanik inatsit imaqarpoq.

Kuunni akuersissuteqarfiusuni inuit unioqquitsillutik aalisartut pineqaatissinneqarnissaannik § 27-mi pisinnaatitsisoqarpoq.

3. Pisortanut aningaasaqarnikkut allaffissornikkullu kingunerisassai.

a. Aningaasatigut kingunerisai.

Kuunnik toqqaaneq kommunit piffissamik atuinissaannik kinguneqassaaq, tassungalu Namminersorlutik Oqartussat kommuninut ukiumoortumik ataatsimut tapiissutaanni taarsiissuteqarnissaq naatsorsorneqassaaq.

Inatsit Nunap Karsiata isertitaqarneranik kinguneqassaaq. Akuersissutunik pigisaqartut akiliutaasa annertussusaat ullormut ataatsimut inummut ataatsimut aalajangersimasumik aningaasatigut aalajangerneqartoq aalajangersarneqarpoq.

Kuummut ataatsimut ullormut ataatsimut inummut ataatsimut ukioq siulleq akiliutissaq 150,00 kr.-inik annertussilerneqarpat, ukiumi piffissami aalisarfigineqarsinnaasumi tikeraartut 40-t tamarmik ulluni tallimani aalisarpata nunap karsianut tamakkerlugu 30.000 kr.-inik isertitaqarnermik kinguneqassaaq.

Suliffeqarfiit Kalaallit Nunaanni sukisaarsaatigalugu aalisartunik aalisartitsisartut maannakkut tallimaniit arfinilinnut amerlanerunngillat, ilimagineqanngilarlu ukiumi siullermi qinnuteqartunut pisinnaasaqartunut akuersissutit arfinilinnit amerlanerusut tunniunneqarsinnaassasut. Akuersissutit arfinillit kuummi ataatsimi ukiumi ataatsimi 30.000 kr.-iuppata nunap karsiata ukiut pissarsiassai tamarmiusut 180.000 kr.-iussapput.

Aalisartup ataatsip ullormut ataatsimut akiliutissai 150 kr.-iusut akuersissummik pigisaqartup sukisaarsaatigalugu aalisartumik 1.000 kr.-it 3.000 kr.-illu akornanni akiliisitsinissaata piviusorsioruuneranut sanilliullugu isigineqassapput. 150 kr.-it ullormut kaaviaartitat 1.500 kr.-iusut 10 %-iisa annertoqatigissavaa.

Aaqqissuussineq nunap karsianut isertitsissutaasussaagaluartoq oqaatigineqassaaq nunap karsianut isertitsissutaalernissaa aaqqissuussinermi pingaarnertut siunertarineqanngitsoq, kisiannili inuussutissarsiorut pitsaanerusunik atugassaqartilernissaat siunertaasoq.

Inuiaqatigiinnut aningaasatigut annertunerusunik saniatigut sunniuteqassaaq, tassa akuersissummik pigisaqartut aalisarsinnaatitaanermik tuniniaanermi isertitaminnit akileraarutininik akiliisussaammata, aaqqissuussinermilu takornarissat pisinnaassuseqarluartut sullissinermi kaaviiartitanik pilersitsinnaasut sullinneqalertussaammata nioqutissanillu assersuutigalugu neriniartarfinni, akunnittarfinni unnuinerni tammajuitsunillu pisinermi aningaasatigut kaaviiartitanik pilersitsisussaammata sumiiffinni inuiaqatigiinnut aningaasatigut tamanna aamma pitsaasumik sunniuteqassaaq.

Piumasaqaataavoq Kalaallit Nunaanni Aalisarsinnaanermut Akuersissutinik Nakkutilliivimmi piniarnermik nakkutilliisut aaqqissuussinermik nakkutilliissasut, tamannalu sumiiffinnut akuersissuteqarfiusunut angalasarnerni angalanermut aningaasartuuteqarnermik kinguneqassaaq.

b. Pisortanut allaffissornikkut kingunissai.

Piffissamik annertuumik atuinermik aaqqissuussineq Naalakkersuisunut kinguneqassaaq. Siullermik qinnuteqaatit suliarineqassapput, taassumalu kingorna akuersissuteqarnermi nalunaarutit akuersissutinut ataasiakkaanut piumasaqaatinik sukumiisunik killilersuisut oqaasertalersorneqassapput tunniunneqarlutillu. Taassuma kingorna ukiumoortumik akiliutip naatsorneranut akilersinniarneranullu piffissamik atuisoqassaaq, aammalu aaqqissuussinermik

qulliunerusumik nakkutilliinermi piffissamik atuisoqassalluni.

Aaqqissuussineq kommuninut allaffissornikkut suliassanik arlalinnik kinguneqassaaq. Kuunnik piukkunnarsinnaasunik kommunit paasiniaassapput, taakkunanngalu kuuttut akuersissuteqarnermi atorneqartussanik inassuteqaateqassallutik, suliassarlu taanna qanittumiinnermik tunngavik aallaavigalugu kommuniniitinneqarpoq, kalluarneqartussanullu sapinngisamik qinuttumiittunit sumiiffinnillu ilisimasaqartunit suliassat suliarineqarnissaat taakku kissaatigaat.

Naliliisoqarpoq AC-fuldmægtigip ataatsip ukiumut tiimit suliffigisaata sisamararterutaanik piffissamik atuisoqassasoq.

4. Inuussutissarsiortunut aningaasatigut allaffissornikkullu kingunissai.

Takornariaq sukisaarsaatigalugu aalisartuq ataaseq ullormut aalaajangersimasumik akiliisussaammat, aaqqissuussineq akuersissutinik pigisaqartunut aningaasatigut kinguneqassaaq.

Akuersissummik pigisaqartoq assersuutigalugu nunanit allaneersunik 40-nik sullitaqarpat, taakkulu tamarmik ulluni tallimani kuuit eqqaaniippata, inuup ataatsip ullormut ataatsimut akiliutaa 150 kr.-iuppat ukiumoortumik akiliut akuersissummut ataatsimut 30.000 kr.-iussaaq. Taamatut akiliteqarnikkut sukisaarsaatigalugu aalisartut nunanit allaneersut allat kuummukannginnissaannik akuersissummik pigisaqartoq qulakkeerinniffigineqassaaq.

Takornariartitsinermik inuussutissarsiuteqartut ilaasa nunanit allaneersunik taamaallaat aalisarniarlutik Kalaallit Nunaannut tikittartunik aalisarsinnaajumallutillu ullormut annertungaatsiartumik akiliinissamut piareersimasunik sukisaarsaatigalugu aalisartunik aalisartitsisartut aaqqissuussinermi pineqarput. Tamanna pissutigalugu Kalaallit Nunaanni tamani kuuit akuersissuteqarfiusut amerlanerpaamik 20-nut killilerneqarput.

Kalaallit Nunaannut sukisaarsaatigalugu aalisarlutik takornarissanik nunanit allaneersunik takornariartitsinermik aaqqissuisartut pillugit maannakkut pissutsit qivieraanni ulluni arlalinni kuummut angallammik angallassineq, illuaqqami tupeqarfimmiluunniit unnuineq ilanngullugit aaqqissuussinerup akia ullumikkut 1.000 kr.-it 3.000 kr.-illu akornaniigajuttarpoq. Tassani illoqarfimmi akunnittarfimmi unnuineq tikiffissamut assersuutigalugu Sisimiunut Kangerlussuarmulluunnit timmisartumik angalaneq ilanngunneqanngillat.

Sukisaarsaatigalugu aalisarluni takornarissap ullormut akiliutaata 1.000 kr.-iusup akiliutip 150 kr.-iusup 15 %-ia assigaa. Akimut 3.000 kr.-iumut tunngatillugu sukisaarsaatigalugu aalisarluni takornarissap ullormut akiliutaata 3.000 kr.-iusup akiliutip 150 kr.-ip 5 %-ia

assigaa.

Ullormut akiliutip 150 kr.-iusup taamaalilluni Kalaallit Nunaanni kuummi eqalunniarluarfiusumi sukisaarsaatigalugu aalisartunik aalisartitsinermi niuernermi ullormut kaaviiartitat nalinginnaasut 5 %-it 15%-illu akornanniittut assigaa.

Ilimagineqartiaqarpoq sukisaarsaatigalugu aalisarnermik aqqissuisup sullissami akiliutaasa qaffannissaannut periarfissaqartoq akiliummullu naleqquttumik akigititani annertussusilerlugu. Kuummi akuersissuteqarfiusumi aalisarnej kuummi akuersissuteqarfiunngitsumi aalisarnermit pitsaanerusutut isigineqartariaqarpoq, taamaammallu aqqissuisup akuersissuteqarnermut akiliutip assigisaanik akitigitani aamma annertussusilersinnaassavaa.

Akuersissuteqarnissamik neqeroorfigineqartumut ukiumi piffissap aalisarfiusinnaasup ingerlanerani paasissutissanik immersuiffissap immersornerani allaffissornikkut suliassaqaassaaq. Immersugassat taakku ukiut tamaasa nassiunneqartassapput.

Kalaallit Nunaanni takornariartitsinermi ingerlatsisut suliffeqarfiugajummata mikisut, akuersissummut akiliutip imatut qaffasitsiginissaa pinngitsoorneqartariaqarpoq, akuersissummik pissarsinissaq aningaasatigut kajummissuujunnaartillugu. Kuup eqaloqarfiup piffissami sivisuumi aningaasatigut annertuumik kaaviiartitsilissutaanissaa akuersissummi siunertaavoq.

Sukisaarsaatigalugu aalisartuni nunanit tamaneersuni pisisinnaassuseqarluartut pilersinneqarnissaat aqqissuussinermi siunertaavoq. Ilimagineqarpoq takornarissat taakku sumiiffinni aalisariarnermik aqqissuiffiusuni aningaasatigut kaaviiartitsinermik pilersitsissasut. Aalisarfimmi tammaarsimaarfimmut attartorluni angallanneqarnissaq ugartorneqalissaaq, aalisarfimmilu tammaarsimaarfimmut angalannginnermi angalareerneramilu akunnittarfinni unnuiffissat ugartorneqassallutik. Aammattaaq neriniartarfinni nerisassanik sullississutinillu allanik pisinissamik pisariaqartitsisoqassaaq.

5. Avatangiisinut pinngortitamullu kingunissai

Kuunnik nungusaataangitsumik atuinissamik piumasaqaateqarneq akuersissummik tunniussinerup kinguneraa aammalu kuup eqqaata eqqiluutsuutinnissaanut sukujoqannginnissaanullu akuersissut pillugu isumaqatigiissummi akuersissummik pigisaqartumut avatangiisit pillugit piumasaqaateqartoqassaaq. Aqqissuussinermik isumassarsiap immikkoortua pingaartoq tassaavoq takornarissap pinngortitamik ajoquserneqarsimanngitsumik kusanartumillu misigisaqarnissaa.

6. Innuttaasunut allaffissornikkut kingunissai

Innuttaasunut nalinginnaasunut akuersissummik pigisaqanngitsunut allaffissornikkut suliaassartaqassanngilaq.

7. Naalagaaffeqatigiinnermi pissutsit

Siunnersuut Naalagaaffeqatigiinnermi pissutsinut sunniuteqanngilaq.

8. Pisortanut kattuffinnullu tusarniaaneq

Inatsisissatut siunnersuut piffissami ulloq 19. november 2010-miit ulloq 20. januar 2011-p tungaanut Nunamut Namminermt, Pinngortitamut Avatangiisinullu Naalackersuisoqarfimmut, Aningaasaqarnermt Naalackersuisoqarfimmut, Inuussutissarsiornermt Suliffeqarnermullu Naalackersuisoqarfimmut, KANUKOKA-mut, KNAPK-mut aamma Nunatsinni Takornariartitsinermt Inuussutissarsiornermullu Siunnersuisoqatigiinnut tusarniaassutigineqarpoq. Taassuma saniatigut Kalaallit Nunaanni Sulisitsisut Peqatigiiffianit, Inuit Circumpolar Councilimit (ICC), Qeqqata Kommunanit, Qeqqani Inuussutissarsiornermt Siunnersuisoqatigiinnit, Kommuneqarfik Sermersuumit, Kommune Kujallermit aamma Qeqqata Kommunaniani innuttaasut ilaannit tusarniaanermi akissutit tiguneqarput.

Tusarniaanermi akissutinut oqaaseqaatit uingasunngorlugit allassimapput.

Tusarniaanermi akissutit tiguneqareernerisa kingorna KANUKOKA aamma KNAPK aprilimi 2011-mi aamma Nunatsinni Takornariartitsinermt Inuussutissarsiornermullu Siunnersuisoqatigiit majimi 2011-mi nangitseqqilluni ataatsimeeqatigineqarput.

Tusarniaanermi akissut Nunatsinni Takornariartitsinermt Inuussutissarsiornermullu Siunnersuisoqatigiit peqatigalugit suliarineqartoq Inuussutissarsiornermt Suliffeqarnermullu Naalackersuisoqarfiup ulloq 8.12.2010-mi nassiuppaa, tasanilu pissutsit arlallit oqaaseqaateqarfigineqarput. Ilaatigut tikkuarneqarpoq kuunnut sorlernut akuersissummik nalunaaruteqartoqarnissaanik aalajangiinnginnermi suliamut atuumassuteqartut tusarniaaffigineqassat. Kikkut akuersissummik tunineqarnissaat pillugu Inuussutissarsiornermt Suliffeqarnermullu Naalackersuisoqarfik isumaqarpoq sumiiffimmut atuumassuteqarnissaq pillugu piumasaqaateqartoqartariaqanngitsoq, isumaqarpullu suliffeqarfiit ataasiakkaat qanoq amerlatigusunik pigisaqarsinnaanerit siunnersuutigineqartutut killilersorneqartariaqanngitsoq, tassa suliffeqarfiit angisuut suliamik ilisimasaqarnerummata pitsaanerusumillu ingerlatsisinnaammata.

Kuunnik atuinissamik soqutigisaqarneq pillugu tamanut ammasumik tusarniaasoqarnissaanik kissaatigineqartoq malinneqarpoq. Ingerlatsisup ataatsip akuersissutit pigisinnaasaa amerlanerpaaffissaat marlunnut qaffanneqarput.

Siunnersuutip itigartitsissutigineqarnissaa kinguartinneqarsinnaaneraluunniit KNAPK-p tusarniaanermi akissummini 6. Januar 2010-meersumi qinnuteqaatigaa, oqaatigineqarluni taanna aalisarnerusiq kuunnik eqaloqarfiusunik qangalili atuisunik aklerliissuteqarluni ingerlanneqartartoq tuttoqarfinnilu piniartunik akornusersuiffiusarluni. Tassani nunap inoqqaavisa pisinnaatitaaffii pillugit isumaqatigiissut FN-p 2007-imi akuerisaa innersuussutigineqarpoq, tassani ilaatigut allaqgalluni nunap inoqqaavi sumiiffinnik qangalili pigisaminni pisinnaatitaaffeqartut. Sumiiffiit qangalili eqalunniarfiusartut pillugit KNAPK-p piunasaqaatigaa sukisaarsaatigalugu aalisartut iliuseqartarnerat killilersorneqassasq imaluunniit kuuit akuersissuteqarfiusut ungasissumiittut qangalili aalisarfigineqarneq ajortut toqqarneqassasut. KNAPK-li pingaarnerusumik isumaqarpoq isumassarsiaq tapersersorumartuusooq, piviusunngortinneqassappallu kajumissaarutigineqarpoq qangali aalisartartut takornariartitsinermi peqataanissaannut periarfissinneqassasut. Inatsisissatut siunnersuummik ingerlatitseqqinnginnermi sumiiffinnik qangalili eqalunniarfiusartunik nalunaarsuinissaq ujartorneqarpoq.

KNAPK-mit tusarniaanermi akissut eqqarsaatigalugu, kuunnik ataasiakkaanik atuinermi soqutigisat paasiniaaffiginiarlugit kommunit siamasissumik tusarniaasussaatitaanerat siunnersuummi § 10-mi ilanngussinikkut isumaat malinniarneqarpoq. Taamatut tusarniaaneq tunngavigalugu qangalili aalisarnermi sukisaarsaatigalugulu aalisarnermi kuunnik minnerpaamik aporaaffiusussanik toqqaasoqarsinnaavoq. Kuunnili namminerni qissattarluni sukisaarsaatigalugu aalisarneq peqatigalugu kuuit paavanni qassusersorluni qangalili aalisarfiusartunik toqqaasoqarnissaa pinngitsoorneqarsinnaanngilaq

KANUKOKA-p ilaatigut siunnersuutigaa kuuit akuersissuteqarfiusut sorliit toqqarnissaat pillugu inassuteqaateqannginnermi kommunit kuuit sorliit inassuteqaatigilersaarneraat pillugit kommunit tusarniaasassasut. Kommuninut suliaakkiissutit eqqarsaatigalugit kommunit tamassuminnga taarsiiffigineqarnissaat KANUKOKA-p piunasaqaatigaa.

Tusarniaanissamik kissaateqarneq inatsisissatut siunnersuummi malinneqarpoq. Imaalillugulu kommunimi kuunni tamani atuinermi soqutigisat pillugit siamasissumik tusarniaasoqassasooq. Taassuma kingorna kuuit sorliit toqqarneqarnissaannik Naalackersuisunut kommunit inassuteqaateqarnissamik aalajangiinissami pitsaaneruseqarnissamik tunngavissaqarsinnaapput. Kommuninut suliaakkiissutinut taarsiissutit Namminersorlutik Oqartussat kommuninut ukiumoortumik tapiissutaatigut akilerneqartassapput.

Kommune Kujalliap tusarniaanermi akissummini oqaatigaa siunnersuut tapersersorneqartooq. Kissaatigineqarporli aaqquussineq sumiiffinni ingerlatsisunut iluaqutaassasooq sumiiffinnilu innuttaasut aalisarsinnaanerit ingerlatiinnarneqassasooq.

Sumiiffinni aamma Kalaallit Nunaanni aalajangersimasumik najugaqartut allat

aalisarsinnaanerat ingerlaannassaaq, akuersissutinillu pigisaqartussanik toqqaanermi sumiiffimmut atassuteqarneq ilaatigut isiginiarneqassaaq.

Kommuneqarfik Sermersuup tusarniaanermi akissummini ilaatigut siunnersuutigaa kuunnik ataasiakkaanik aqutsinermi assigiinngitsunik pilersarusiortoqassasoq, taamaalilluni taakkunani ilaatigut piffissat eqqissisimatitsiviit aammalu kuunni ataasiakkaani qanoq annertutigisumik aalisartoqarsinnaanera pillugit annertunerusunik aalajangersaasoqassalluni. Sukisaarsaatigalugu aalisartut ataasiakkaat aalisakkanik qassinik pisaqarneri nalunaarutigineqartariaqarput. Kommuni isumaqarpoq ingerlatsisut ataasiakkaat kuunni arlalinni ingerlatsinissaminut piukkunnaateqarsinnaasut, pilersuinerullu aqqissuunera tamanna iluaquteqaateqarsinnaasooq.

Aqutsinermi pilersaariusiortoqarnissaanik kissaateqarneq imaalillugu malinneqarpoq, kuummi qanoq annertutigisumik aalisartoqarsinnaaneranik kommuni nalilersuissasoq, tamannalu akuersissut pillugu isumaqatigiisummi allassimassasoq. Aammattaaq akuersissummik pigisaqartup kuunni arlalinni ingerlatsisinnaaneranik kissaaticigineqartoq malinneqarpoq. Kuuit paavanni qassusersorluni aalisarnermi piffissat eqqissisimatitsiviusinnaasut pillugit aalajangersakkat eqalunniarneq pillugu kommunit malittareqqusaanni maannakkutut ilanngunneqarsinnaapput.

Kalaallit Nunaanni Sulisitsisut Peqatigiiffiata (GA) oqaatigaa nuna tamakkerlugu kuuit 15-it nuna tamakkerlugu ingerlatsisunut sisamanut tallimanut tunngaviliissasut, kuuillu akuersissuteqarfiusinnaasut katillugit amerlassusaat 30-usariaqartut. Akuersissutinik pigisaqartussanik toqqaaneq eqqarsaatigalugu sumiiffinni inuussutissarsionermut siunnersuisoqatigiit tamassuminnga tusarniaaffigineqartariaqarput, tassani ilaatigut inuussutissarsiutit immikkoortuanni misilittakkat sullitallu amerlassusaat pingaartinneqassallutik. Ingerlatsinermik paasisimasaqarneq annertunerusoq tunngavigitinniarlugu ingerlatsisut ataasiakkaat kuunni pingasut tikillugit GA malillugu akuersissuteqarsinnaasariaqarput. Suliffeqarfiit pillugit oqaasertaliinissaq kissaaticigineqarpoq, taamaalilluni suliffeqarfiit nutaat pilersinneqartut inuit piginnittut Kalaallit Nunaannut naammattumik atassuteqarpata akuersissummik tunineqarsinnaassallutik.

Inatsisissatut siunnersuummut tusarniaassutigineqartumut tunngatillugu Kalaallit Nunaanni kuuit akuersissuteqarfiusinnaasut katillugit amerlassusaat 15-iniit 20-nut amerlineqarput. Aammattaaq akuersissutinik pigisaqartut ataasiakkaat kuuit akuersissuteqarfigisinnaasaasa amerlanerpaaffissaat ataatsimiiit marlunnut amerlineqarput.

Aammattaaq” Kalaallit Nunaanni akiliuteqarluni aalisarnermit aningaasatigut pissarsianik pitsaanerpaangortitsiniarnermi periusissatut siunnersuut”, 2009-meersoq innersuussutigineqarpoq, kuuit eqaloqarfiusut katillugit 196 missaanni amerlassuseqartunit kuuit 16-it kuuttut akuersissuteqarfiusutut atorneqarsinnaanissaat tassani

inassuteqaatigineqarpoq. Suliffeqarfiit pillugit GA-p kissaataa malinneqarpoq. Kalaallit Nunaanni Takornariartitsinermut Inuussutissarsiornermullu Siunnersuisoqatigiinnik pinngitsoorani tusarniaanissaq inatsisissatut siunnersuummi ilanngunneqarpoq, tassa siunnersuisoqatigiit taakku Kalaallit Nunaanni takornariartitsinermik ingerlatsisunik ataasiakkaanik ilisimasaqarluarnissaat ilimagineqarmat.

Nunat inoqqaavisa ileqqui nunamillu piginneriaasiat pillugu nunat inoqqaavisa pisinnaatitaaffii pillugit FN-ip nalunaarutaani artikili 27 Inuit Circumpolar Councilip innersuussutigaa. Kuunnik toqqaanermut tunngatillugu ammasumik suleriaaseqarnissaq kissaatigineqarpoq, tassani kuunnik toqqaaneq pillugu tusarniaanermi oqallinnermilu innuttaasut tamarmik peqataaquneqassallutik.

Kuunnik atuinermik soqutigisarineqartut pillugit pinngitsoorani tusarniaanissami Inuit Circumpolar Councilip Nuummiittup tusarniaaneq pillugu kissaataa nassiunneqartoq isiginiarneqarpoq.

Qeqqata Kommuniata tusarniaanermi akissummini ilaatigut piuamasaraa sumiiffinni innuttaasut aalisarsinnaanermut periarfissaat ajornerulersinneqassanngitsut. Aammattaaq kommunit kuunnik toqqaanissaat piumasarineqarpoq.

Tassunga oqaatigineqassaaq sumiiffinni innuttaasut aalisarsinnaanerat ingerlaannassasoq, tamannalu malittarisassani allani killilersorneqarumaartoq, tassunga ilanngullugu kommunit malittareqqusaanni. Kuunnik sumiiffinni innuttaasut annertuumik aalisarfigineq ajugaannik kommunit suleqatigalugit toqqaasoqarniarsarisarisoqarpoq. Kuunnik toqqaanissaq pillugu kommunit inassuteqaatiminnik nassiussissapput.

Sumiiffinni innuttaasut kuunnik qangalili atuisarnerannik Qeqqata Kommuniani innuttaasut ilaat innersuussuteqarput, piumasalarugulu qanoq iliuuseqaqqinnginnermi atuisut inuttaasullu akornanni pimoorullugu oqallittoqassasoq, tassani aamma tusarniaasoqassalluni.

Kommunini kuunnik atuinermik soqutigisaqarneq pillugu siumut tusarniaasoqarnissaa pillugu piumasaqaat inatsimmi ilanngunneqarpoq.

Qeqqani Inuussutissarsiornermut Siunnersuisoqatigiit ilaatigut siunnersuutigaat kommunimi pineqartumi innuttaasut kisimik aalisarsinnaassasut.

Naliliisoqarpoq takornarissat ikitsuararsuit Kalaallit Nunaanni kommuninik allaneersuussasut tamannalu tunngavigalugu siunnersuut malinneqanngilaq. Aammattaaq tamanna nakkutigiuminaatsorujussuussaaq.

Assersuutigalugu inuit nunanit allaneersut kuunnut akuersissuteqarfiusunut nunami namminerme aalisarsinnaanermut akuersissutinik pissarsisinnaaneri pillugit erseqqissaanissaq

Kalaallit Nunaanni Politiit tusarniaanermi akissummi ulloq 18. Januar 2011-meersumi ujartorpaat.

Kuunni akuersissuteqarfiusuni kikkut aalisarsinnaanerisa erseqqissaaffigineqarnissaanik Kalaallit Nunaanni politiit kissaateqarnerat tunngavigalugu siunnersuummi paragrafit siulliit pingasut allatut oqaasertalersuinikkut Naalakkersuisut malinniarsaraat, taamaalilluni kuunni akuersissuteqarfiusuni kikkut aalisarsinnaanersut kikkullu aalisarsinnaanginnerusut maannakut erseqqarinnerulerpoq. Taassuma kingorna § 27-mi pineqaatissiisarneq pillugu aalajangersagaq ajornannginnerusumik atorneqarsinnaalerpoq.

Nunamut Namminermut, Pinngortitamut Avatangiisinullu Naalakkersuisoqarfiup tusarniaanermi akissummini ulloq 17. december 2010 ullulernerqartumi oqaatigaa kuunni ungasissuniittuni sukisaarsaatigalugu aalisartut ullormut 2.000 kr.-it missaanni akiliisinnaaneria qularnartoqarnera isumaqarfigigitsik.

Akiliut pillugu Nunamut Namminermut, Pinngortitamut Avatangiisinullu Naalakkersuisoqarfiup siunnersuutigaa aqqissuisoqassasoq, tassani akuersissummut qanoq annertutigisumik akiliinissamut qinnuteqartut namminneq neqerooruteqassallutik. Aammattaaq Nunamut Namminermut, Pinngortitamut Avatangiisinullu Naalakkersuisoqarfiup tikkuarpaa taseq kuummut atasoq akuersissummi ilanngunneqarsinnaanersooq akuersissummik nalunaarummi allaaserineqassasoq. Nunamut Namminermut, Pinngortitamut Avatangiisinullu Naalakkersuisoqarfiup oqaatigaa qinnuteqartup annertunerpaamik aningaasatigut kaaviiartitsisinnaasutut naliliiffigineqartup akuersissummik pissarsinissaa inatsimmi erseqqissarneqartariaqartoq.

Aaqqissuisup siusinnerusukkut aningaasatigut qanoq kaaviiartitsisimanera akuersissutinik pissarsisinnaasut toqqarneranni isiginiarneqarpoq. Akiliutit pillugit Naalakkersuisoqarfiup siunnersuutaanut atatillugu periuseq akuersissummik pigisaqartup ajornannginnerusumik aningaasaliiffigisinnaasa toqqarneqarpoq.

Aalajangersakkanut ataasiakkaanut oqaaseqaatit

Kapitali 1

Atuuffia

§ 1-imut

Aalajangersakkami tassani sukisaarsaatigalugu aalisarnermut akuersissut pingaarnertut saqqummiunneqarpoq, taamaallaallu eqalunnik (salvelinus alpinus) aalisarneq akuersissummi pineqartoq ilaatigut erseqqissarneqarluni.

Sukisaarsaatigalugu aalisarnissamut takornarissanut neqeroorutigineqartumut akuersissutit

atuunnera piunasaqaataavoq. Akuersissummik pigisaqartoq taamaalilluni eqalunnik amerlasuunik pisaqarniarpat taakkulu nerisassatut tunillugit, tamanna akuersissuteqartarnermik aqqissuussinermi siunertaanngilaq.

Aammattaaq aqqissuussinermi siunertaanngilaq akuersissummik pigisaqartoq akuersissummik tunineqassasoq, taassumalu kingorna pisinnaatitaaneq nammineq sukisaarsaatigalugu aalisarnerminut imaluunniit sukisaarsaatigalugu aalisartunik aalisartitsinermi suliffeqarfinnut suleqatigiittunnut namminersortunut atorlugu.

Imm. 2-mut

Kuunnut sukisaarsaatigalugu aalisarlutik takornarissanut aqqissuussiffiusunut sukisaarsaatigalugu aalisartut nunanit allaneersut arlallit ataasiakkaalluunnit takkutinnnginnissaannik takornariartitsinermi suliffeqarfiit nunani allamiunut sukisaarsaatigalugu aalisarnermik aqqissuussisartut (nunani allamiunut tassunga atatillugu inuit Danmarkimi najugaqartut aamma pineqarput) akuersissuteqarnikut qulakkeerinniffigineqarput. Taamaalilluni immikkuullarissumik sullissinissaq qulakkeerneqarpoq takornariartitsinermilu suliffeqarfiit immaqa nunani allani suleqatit aqutugalugit nunani allani takoqqusaarinissamut tunngavissaqarlualerput. Nunani allamiut sorliit Kalaallit Nunaanni inuussutissarsiutigalugu aalisarsinnaanngitsutut nunaqavissuunngitsutullu isigineqartut pillugit aalisarneq pillugu inatsimmi § 8, imm. 3-mi aalajangersakkami nassuiaaneq malinneqarpoq.

Kapitali 2

Sukisaarsaatigalugu aalisartunik aalisartitsinermut akuersissut

§ 2-mut

Kuummit immikkut atuisinnaatitaanermut akuersissummik tunniussisoqaraangat, isumaqarpoq, inuit Kalaallit Nunaanni najugaqavissuunngitsut atuisinnaanermut akuersissummik kisimik tunineqartassasut.

Kikkut nunaqavissutut isigineqarnerat kikkullu sukisaarsaatigalugu aalisartutut nunanit allaneersutut isigineqarnerat pillugu nassuiaatip inuussutissarsiutigalugu aalisarneq pillugu, aalisarneq pillugu inatsimmi § 8, imm. 1-imi nassuiaat assigaa.

Kalaallit Nunaanni tamani atuuttumik aalisarsinnaanermut akuersissummik pissarsilluni immikkut akuersissuteqarfigineqarsinnaanikkut Kalaallit Nunaanni inuussutissarsiutigalugu aalisarsinnaatitaaneq pillugu aalisarneq pillugu inatsimmi § 8, imm. 3-mi periutsimik § 2-mi aalajangersagaq saneqqunneqarpoq.

Kalaallit Nunaanni aalajangersimasumik najugaqarnissamik piunasaqaat eqqortinniarlugu

pineqartoq Kalaallit Nunaanni innuttaasunik nalunaarsuiffimmi nalunaarsorneqarsimassaaq Kalaallillu Nunaanni inissiamik pigisaqassallunni imaluunniit inissiamik attartortuussalluni.

Imm. 2-mut

Nunani allamiut sorliit nunaqavissutut Kalaallit Nunaanni inuussutissarsiutigiginagu aalisarsinnaatitaasutut isigineqannginneri pillugu aalisarneq pillugu inatsimmi § 8, imm. 2-mi aamma imm. 3-mi nassuiaat aalajangersakkami malinneqarpoq. Tamanna isumaqarpoq nunat allat naalagaaffiini Danmarkimiunngitsoq innuttaasut inuussutissarsiutigiginagu aalisarsinnaanermik kissaateqartut piffissami ukiut siuliini tulleriinni marlunni Kalaallit Nunaanni aalajangersimasumik najoqarsimannngitsut akuersissuteqarfiusumi aalisarsinnaatitaanngitsut.

Imm. 3-mut

Kuuk pillugu akuersissummik tunniussisoqarsimagaluartoq sumiiffimmi innuuttaasut eqalunniartarnerisa ingerlatiinnarneqarnissaa aalajangersakkami erseqqissarneqarpoq. Aamma inuit Kalaallit Nunaanni sumiiffinni allani najugaqartut akuersissuteqarfiusuni aalisarsinnaassapput.

§ 3-mut

Akuersissummik tunniussinissaq pillugu Naalakkersuisut aalajangiisinnaanermik pisinnaatinneqartut aalajangersakkami oqaatigineqarpoq.

Akuersissummut annertunerusunik piumasaqaatinik aalajangersaasumik akuersissuteqarnermik nalunaarummik tunniussinikkut akuersissut tunniunneqassaaq.

Sumiiffimmut aalisakkanik tulaassiviusumi atorneqartussamik akuersissummik tunniussinissaq aaqqissuussinermi siunertaavoq, tamannalu amerlanerpaatigut kuup eqqaa pineqassaaq. Oqaasertaliinerli ” sumiiffimmut annertunerusumik killikkamut” ilanngunneqarpoq akuersissutip assersuutigalugu kangerluup iluanik taaneqartartumi atorneqarsinnaatillugu tunniunneqarsinnaatinniarlugu. Akuersissut kuup ilaani imaluunniit tatsimi kuummut atasumi imaluunniit kuummi tatsimilu ataatsimoortillugit atorneqarsinnaasunnngortillugu aamma tunniunneqarsinnaavoq.

Akuersissummi kuuk pineqaraangat taassuma paava aallaavigalugu allaaserineqartarpoq. Tamanna isumaqarpoq ulinnganerpaaffiani kuuit immallu naapiffiat.

Nunamik immamillu assilioriaaseq map-info periuuserluunniit naleqquttoq alla nunap immallu assii atorlugit takutitsinermi atorneqassapput.

Kapitali 3

Akuersissummik pigisaqarnermut piumasaqaatit

§ 4-mut

Akuersissuteqarnermut annertunerusunik piumasaqaatinik nassuiaatitut akuersissut pillugu isumaqatigiissut ilusilersorneqassaaq. Akuersissut pillugu isumaqatigiissut atsiugaq aallaavigalugu akuersissummik pigisaqartup pisussaaffini pisinnaatitaaffinilu takusinnaavai.

Akuersissummik nalunaarummi sinaakkutit pingaarnerit minnerpaamillu piumasaqaatit nassuiarniarlugit aammalu immikkoortunik pingaarnernik akuersissuteqarnermik nalunaarummi ilanngunneqartussanik misissuinermi atugassatut piumasaqaatit pingaarnerit inatsimmi allaaserineqarput.

§ 5-imut

Kuuit akuersissuteqarfiusut eqqaanni avatangiisit saligaatsuutinnissaannik pisussaaffeqarneq pillugu aalajangersagaq aamma akuersissut pillugu isumaqatigiissummi ilanngunneqassaaq. Pingaartumik piffissap akuersissuteqarfiusup atorunnaalerneranut atatillugu arlaannik pisussaaffeqarnissaq pisariaqartinneqarsinnaavoq.

§ 6 -imut

Aalisarneq pillugu naatsorsueqqissaarusiortussaataaneq pillugu aalajangersagaq aamma akuersissut pillugu isumaqatigiissummi ilanngunneqassaaq. Aalisarneq pillugu immersuiffimmik immersuisussaataaneq pingaaruteqarpoq, tassa sukisaarsaatigalugu aalisartut nunani allaneersut kuummi ullut tamaasa aalisartut amerlassusaat pillugu paasissutissat aallaavigalugit akuersissutinut akiliutit naatsorsorneqartarmata.

Imm. 2-mut

Ukiumi piffissami aalisarfiusinnaasumi ullut tamaasa aalisarneq pillugu paasissutissiilluni immersugassaq immersorneqarsimasoq nassiunneqassaaq. Immersukkami paasissutissat eqqortuunissaat pingaaruteqarpoq, tassa paasissutissat taakku ukiumoortumik akiliutissap naatsorsornerani tungaviusussaammata.

Sukisaarsaatigalugu aalisartut amerlassusaat pillugu kukkusumik nalunaarusiorneq pissutsit suuneri malillugit akuersissummik pigisaqartup pisussaataaffinik annertuumik unioqutitsinerusinnaavoq.

§ 7-imut

Inuk kuummik atuisinnaanermik akuersissummik pissarsisimagaluaruniluunniit pineqartup atortut atorneqartussatut kissaatigisani nammineq aalajangersinnaanngilai. Aalisakkat pisarineqartut amerlassusaannut pingaaruteqarpoq aalisarnerup annertussusiata akunnattuunissaa tassungalu atatillugu atortut suut atorneqarsinnaanerisa killiliiffigineqarnissaat pingaaruteqarpoq.

Akuersissummik tunniussisoqaraangat akuersissummik pigisaqartup nerisassanngorlugit aalisakkanik amerlasuunik pisaqarluni tuniniaanissaa siunertarineqanngilaq, kisiannili qaffasissummik pitsaassuseqartumik sukisaarsaatigalugu aalisarnermi kuuat atorneqarnissaat siunertaavoq.

§ 8-mut

Sukisaarsaatigalugu aalisarnek pilerinartuutinniarlugu aalisakkanik angisuunik pisaqarnissaq pingaaruteqarpoq. Eqaluit ukiorpasuarini allisartarput, mianersuussillunilu aalisarnermi angisuunik pisaqarnissamik siunertaqarneq malinneqassaaq. Assersuutigalugu oqummersanik akinik peqanngitsunik atuinermi aalisakkat annikinnerpaamik ajoquserlugit avalatseqqinneqarsinnaapput. Tigusissutinik pinngitsoorani atuinermi aamma aalisakkat annikinnerpaamik ajoquserlugit avalatseqqinneqarsinnaapput. Amoorutinik atuinissamik inerteqquteqarneq oqummersanillu niyugaasalinnik atuneq mianersuussilluni aalisarnissamik allatut qulakkeerinninnerupput.

§ 9-mut

Aalisarsinnaanermut akuersissummik pineqartup akuersissuteqarfiusumi sukisaarsaatigalugu aalisarsinnaatitaaneranik takutitsisumik sukisaarsaatigalugu aalisartunut ataasiakkaanut akuersissummik pigisaqartup tunniussinissaa aalajangersakkami oqaatigineqarpoq.

Akuersissusiornermi periutsit Naalakkersuisunit suliarineqassapput. Sukisaarsaatigalugu aalisartunut ataasiakkaanut akuersissut periutsinik Naalakkersuisut suliarisaannik tunngaveqartoq atuisinnaatitaanermik pigisaqartumit suliarineqassaaq atsiorneqarlunilu.

Akuersissutinik pigisaqartunut ataasiakkaanut aalisarsinnaanermut akuersissutit immikkut tulleriinnillu normulersorneqassapput. Ukiuni piffissani aalisarfiusinnaasuni tamani akuersissuteqartunullu ataasiakkaanut normu 1-i aallartissutigineqassaaq taassumalu kingorna aalisarsinnaanermut akuersissutit tulleriinnik normulesorneqassapput.

Imm. 2-mut

Aalisarsinnaanermut akuersissut atorlugu sukisaarsaatigalugu aalisartut sukisaarsaatigalugu aalisarnermini Kalaallit Nunaanni Aalisarsinnaanermut Akuersissutininik Nakkutilliivimmit akuersissuteqartarnermik aqqissuussinermut atatillugu nakkutilliinermi oqartussaasup aallartitaanut kinaassutsimmik qaqugukkulluunnit paasissutissiissapput.

Kapitali 4

Kuunnik akuersissuteqarfiusunik toqqaaneq

§ 10-mut

Sumiiffinni soqutigineqartut pillugit kommunit siammasissumik tusarniaassapput. Tusarniaanermi ilaatigut ilanngunneqassapput sumiiffimmi inuussutissarsiornermut siunnersuisoqatigiit summiiffimmilu KNAPK-up immikkoortortai. Tusarniaaneq kommunimi innuttaasunut assersuutigalugu kommunip pigisaanik illunik akitsorterussinissamut pilersaartunik takoqqusaarusiaat assigalugit nalinginnaasumik erseqqarissuussapput.

Atuinnermut soqutigisat pingaartumik aalisarnertut assigiinngitsutut paasineqassapput. Taakku tassaasinnaapput qangatulli eqalunniarneq imaluunniit sukisaarsaatigalugu aalisarlutik takornarissanut nunanut allaneersunut aqqissuusinerusinnaallutik. Kuuit paavisa eqqaanni qangatulli eqalunniarnermi qassutit atorineqartut pillugit tusarniaanermi ilaatigut paasinaasoqassaaq.

Tusarniaanissaq kisimi piumasaqaataavoq. Taassuma kingorna kuunnik akuersissuteqarfiusussanik toqqaanissamik inassuteqaatit taassumalu kingorna kuunnik akuersissuteqarfiusunik toqqaaneq ukiumi tusarniaaffiusumi pisariaqanngillat.

Imm. 2-mut.

Piffissaq tusarniaaffiusoq naleqquttoq naammassigaangat tusarniaanermi akissutininik pingaarnernik kommuni eqikkaassaaq. Tusarniaaffigineqartut pingaarnernit tassunga atatillugu tassaapput kuunnik atuisut assigiinngitsut. Tassaasinnaapput ilaqutariit aasat tamaasa kuup eqqaani qangatut qangali eqalunniartartut. Aamma tassaasinnaapput sukisaarsaatigalugu aalisartunik takornarissanut sammitinneqartunik aalisartitsinermik aqqissuisartut.

§ 11-mut

Qanittumiinnermik tunngavik aallaavigalugu kommunimi kuuit sorliit kuuttut akuersissuteqarfiusussatut neqoruutigineqassanersut pillugit kommunit siullermik inassuteqaateqassapput. Kommunit tassaapput oqartussat kuuit sorliit piukkunnartuunerinik siulliullutik pitsaanerpaamik nalilersuisinnaasut.

Kalaallit Nunaanni kuuit eqaloqarfiusut 196-it missaaniipput. Taakku aallavigalugit kuuit akuersissuteqarfiusussatut piukkunnartut amerlassusii killeqassapput, tassami aalisarfiulluarsinnaassapput, sumiiffinnilu nunaqavissunik eqalunniartunit amerlanngitsunit ornigarneqarfiusartussaallutik.

Imm. 2-mut

Kuunnik sukisaarsaatigalugu aalisartunit kuup eqqaani misigisaqarfeqarnissamut periarfissaqarluartunik toqqaaniartoqartassaaq, tassa taakku sukisaarsaatigalugu kisimiillutik aalisartunit pitsaasumik ataatsimut isigalugu misigisaqarfiussammata.

Imm. 3-mut

Kuuit akuersissuteqarfiusut kuuillu nalinginnaasut amerlassusaat sanilliunneqarsinnaaniassammata kuuillu akuersissuteqarfiusut kommuninut assigiinngitsunut agguarnissaat qulakkeerniarlugu kuuit sorliit akuersissuteqarfiussanersut Naalakkersuisut inaarutaamik toqqaassapput.

Kuunnik sorlernik akuersissuteqarnermi atorneqartussanik toqqaaneq pissaaq kuunnt aalajangersimasunut akuersissuteqarfiusunut qinnuteqarsinnaaneq pillugu allaaserineqartutut Naalakkersuisut takoqqusaarusiornerisigut. Kuuit qanoq amerlatigisut akuersissuteqarfiusut sorliit qinnuteqaateqarfigineqarnissaanik tamannalu qaqugukkut pissanersoq Naalakkersuisut aalajangiissapput.

§ 12-imut

Sukisaarsaatigalugu aalisartumut angisuunik aalisakkanik pilerinartunillu aalisagaqarnissaa anguniarneqassaaq. Kuummiit kuummut aammalu piffisamiit piffissamut aalisakkat qanoq amerlatigisut nungusaataanngitsumillu kuummi aalisarneqartarsinnaaneri assigiinneq ajorput, tassanilu aamma agguaqatigiisillugit angissusaata milliartortinnginnissaat mianersuutigineqassalluni.

Nalilersuineri § 12-imi allassimasumi siunertaavoq kuunni ullormut nungusaataanngitsumik qanoq annertugisumik aalisakkat agguaqatigiisillugu annertuumik mikissuseqalersinnagit aalisartoqarsinnaaneranik najoqqutassiornissaq.

Nalilersuineq § 12-imi allassimasooq tunngavigalugu kuummi ullormi ataatsimi aalisakkat qanoq amerlatigisut avalatseqqinnagit pisarineqarsinnaasut pillugit aalajangersagaq akuersissuteqarnermik nalunaarummut ilanngunneqarsinnaavoq.

Najoqqutassiornermi aallaaviusoq tassaavoq eqaluit angisuutillugit nungusaataanngitsumik aalisarnissaq qulakkeerniarlugu kuummi ullormi ataatsimi kilometerimi ataatsimi inummit

ataatsimit amerlanerusut aalisarsinnaanerat akuersissutigineqartariaqanngitsoq.

§ 13-imut

Kuuit eqaloqarfiusut nalinginnaasumik tikinneqarsinnaanissaat Kalaallit Nunaanni pingaarnertut malittarisassaassaaq. Taamaammat kuuit akuersissuteqarfiusut amerlassusaat 20-nut killilerneqarput. Pissutsit ajornartitsinngippata kommunimi ataatsimi kuunnut tallimanik amerlanerusunik ikinnerusunilluunnit akuersissuteqartoqarsinnaavoq.

§ 14-imut

Assigiiartunik ilisarineqarsinnaasunillu allagartaliinissaq pingaaruteqarpoq. Sukisaarsaatigalugu aalisarnermut akuersissuteqartarnek pillugu inatsimmut innersuusummik aammalu aalisarnissamik inerteqquteqarnermik unioqqutitsinermi akiliisitsinikkut pineqaatissiiinnaaneq pillugu ilisimatitsissummik allagartat imaqassapput. Allagartat oqaasertaannik tamanut atuuttunik Naalakkersuisut nassiussissapput.

Allagartat kommunit piareersassavaat, taassumalu kingorna taakku akuersissummik pigisaqartunut akuersissuteqarfiusumut nassartillugit, taakkulu sumiiffimmi kommunimut siumut isumaqatigiissuteqarfigineqartumi nivinngarneqassapput.

Kapitali 5

Akuersissummik tunniussineq

§ 15-imut

Inunnut suliffeqarfinnullu Kalaallit Nunaannut aalajangersimasumik attuumassuteqartunut piffissamilu sivisuumi attuumassuteqarsimasunut akuersissut tunniunneqassaaq. Inuit pimoorunnagu aaqqissuussisut akuersissumik pigisaqavissoq nunami allami najugaqartillugu akuersissummik pissarsissanngillat.

Imm. 2-mut

Qinnuteqaammik suliarinninnermi suliffeqarfiup pineqartup Kalaallit Nunaanni angerlarsimaffeqarneranik uppersaammik suliffeqarfinnik nalunaarsuiffimmi takussutissamik nassitsinissaanik Naalakkersuisut qinnuiviginnissinnaapput.

Imm. 3-mut

Taasisinnaassutsit 2/3-iinik amerlanerusunik pigisaqarneq assersuutigalugu aktiaatillit isumaqatigiissutaat taassuminnga killilersuisoq atorlugu pissarsiarineqarsinnaavoq.

Taasisinaassutsinik 2/3 sinnerlugit pigisaqarneq aktianik anpartinilluunniit taasisinnaasusiisunik pigisaqarnikkut aamma tamanna pissarsiarineqarsinnaavoq, allallu aktiaataat anpartiutaalluunniit taasisinnaassutaasinnaanantik (aktiat a-t imaluunniit aktiat b-t).

Imm. 4-mut

Soqutigisaqartut tamarmik interessentselskabimi piginneqataasut innuttaasunik nalunaarsuiffimmi ukiuni siuliini kingullerni marlunni Kalaallit Nunaanni najugaqarsimasutut nalunaarsorneqarsimassapput.

§ 16-imut

Inuit akuersissummik qinnuteqarnissamik soqutiginnissinnaasut tamarmik tamassuminnga qinnuteqarnissamik perfissaqarneq pillugu ilisimatinneqarnissaat pingaaruteqarpoq.

Kuunnut akuersissut pillugu pilersaarutit pillugit sukumiisumik paasissutissiisoqartariaqarpoq. Takoqqusaarinissaq aalajangersakkami allassimasoq kommunini inuussutissarsiornermut siunnersortinut aamma Kalaallit Nunaanni Takornariartitsinermut Inuussutissarsiornermullu Siunnersuisoqatigiinnut paasissutissiinikkut ilaneqarsinnaavoq. Aviisimi naqitami Kalaallit Nunaanni tamani saqqummersartumi takoqqusaarisooqassaaq.

Qinnuteqartup uppersaatinik ukuninnga pissarsinissaa pillugu ilisimatitsissutinik takoqqusaarut imaqartariaqarpoq:

- anpartsselskabitut, aktieselskabitut imaluunniit interessentselskabitut qinnuteqartup Kalaallit Nunaanni angerlarsimaffeqarneranik suliffeqarfinnik nalunaarsuiffimmit pineqartumit takussutissiaq atorlugu uppersaataat.
- qinnuteqartup aqqa, najugaqarfia e-mail adressia pillugit paasissutissat aammalu nalunaarsuiffimmiit GER-miit takussutissiaq
- inuit ataasiakkaat qinnuteqarneranni pineqartup Kalaallit Nunaanni innuttaasunik nalunaarsuiffimmi nalunaarsorneqarsimaneranik ukiullu siuliini marlunni taamatut nalunaarsorneqarsimaneranik uppersaataat.
- pineqartup Kalaallit Nunaanni tamakkiisumik akileraartussaataitaneranik uppersaataat.

§ 17-imut

Qinnuteqaat ukuninnga imaqartariaqarpoq:

- anpartsselskabip imaluunniit aktieselskabip Kalaallit Nunaanni angerlarsimaffeqarneranik uppersaataat.
- qinnuteqartup aqqa, najugaa e-mail adressia pillugit paasissutissat aammalu nalunaarsuiffimmiit GER-miit takussutissiaq

- inuit ataasiakkaat qinnuteqarneranni pineqartup Kalaallit Nunaanni innuttaasunik nalunaarsuiffimmi nalunaarsorneqarsimaneranik ukiullu siuliini marlunni taamatut nalunaarsorneqarsimaneranik uppersaat.
- pineqartup Kalaallit Nunaanni tamakkiisumik akileraartussaataitaneranik uppersaat.

Imm. 2-mut

Qinnuteqartup piukkunnartuuneranik Naalackersuisut nalilersuisinnaatinniarlugit suliniummik allaaserisaq suliffeqarfimmullu pilersaarut qinnuteqartup akuersissummik qanoq iliorluni atuiniarneranik nassuiaataasussat ilanngunneqassapput.

Suleqatit nunani allaniittut suleqatigalugit suleqatiginagilluunniit akuersissut qanoq iliorluni takoqqusaarutiginiarneqarneraq suliniummik pilersaarummi ilaatigut nassuiarneqassaaq. Aammattaaq takornarissat akuersissuteqarfinniinnerinut atatillugu eqqagassat nalinginnaasut aalisakkanillu eqqagassat qanoq iliorluni passuniarneqarneraq nassuiarneqassaaq.

Imm. 3-mut

Kalaallit Nunaanni Takornariartitsinermit Inuussutissarsiornermullu Siunnersuisoqatigiit takornariartitsinermit inuussutissarsiornermi ingerlatsisunik ilisimasaqarluarput kikkullu sumiiffinni aningaasatigut kaaviaartitsinersaanersut pillugit, isumaallu malillugu akuersissummik atuinermit avatangiisini nungusaataannngitsumik atorfinnik pilersitsisinnaassuseqarnerinik oqaaseqaateqarsinnaassallutik.

Imm. 4-mut

Naatsorsuutininik piniarsinaannermik periarfissaq ilanngunneqarpoq, tassa ingerlatsisup takornariartitsinermit ingerlatsinermit pilersitsisinnaassusiata aningaasatigut qanoq annertutigisumik kaaviartitsisinnaanera taamaattup takutissinnaammagu, tamannalu pineqartup siunissami suliffissanik qanoq annertutigisumik pilersitsisinnaaneranut takussutissaammat.

§ 18-imut

Akuersissuteqarnermit aqqissuussinermi pingaarnertut siunertaasumut tassaasumut sumiiffimmi akuersissuteqarfiusumi aningaasatigut kaaviiartitsinermit suliffissanillu pilertsinermit tunngatillugu qinnuteqartup piukkunnassusianik nalilersuisoqassaaq.

Qinnuteqartoq siusinnerusukkut akuersissummik pigisaqarsimappat piffissaq akuersissuteqarfiusoq naammaginaratumik siusinnerusukkut ingerlanneqarsimappat akuersissummik tunniusseqqinnissamut tunngavilersuutaassaaq pingaaruteqartoq.

Nr. 1

Takornarissanik sukisaarsaatigalugu aalisartunik aalisartitsinermi aaqqissuussinermik qinnuteqartoq taanna sioqqullugu misilittagaqarnera isiginiarneqassaaq.

Takornarissanik sukisaarsaatigalugu aalisartunik aalisartitsinermi aaqqissuussinermik qinnuteqartoq taanna sioqqullugu nunani allani misilittagaqarpat akuersissumik tunniussinissamut tunngavilersuutaassaaq pingaaruteqartoq. Tassaasinnaapput sukisaarsaatigalugu aalisartunik takornariartitsineq, tassani takornarissat taamaallaat sukisaarsaatigalugu aalisarniarlutik Kalaallit Nunaannut tikittut. Angalatitsivimmit Kalaallit Nunaanni avataaniittumit sukisaarsaatigalugu aalisartunik angalatitsinermik immikkut ilisimasaqartumit angalanerit aaqqissugaasinnaapput.

Qinnuteqartup sukisaarsaatigalugu aalisartunik takornariartitsinermi aaqqissuussinermik siusinnerusukkut misilittagaqarsimaneranik nalilersuinermi pineqartup aalisartitsinnermi avatangiisinik pissutsinik qanoq aallussisimanagera soorlu eqqagassanik nalinginnaasunik aalisakkanillu eqqagassanik eqqaasimanagera aamma isiginiarneqassaaq, aammattaaq aalisarnerup nungusaataanngitsumik ingerlanneqarsimanagera isiginiarneqassaaq.

Nr. 2

Qinnuteqartut marluk takornarissanik nunanit allaneersunik sukisaarsaatigalugu aalisartunik aalisarnermik aaqqissuussinermik milittagaqarpata sorliup aningaasatigut kaaviiartitanik annertunerpaamik pilersitsisinnananagera isiginiarneqassaaq, tamanna suliffissanik annertunerpaamik kiap pilersitsinnananageranik takussutissaammat.

Nr. 3

Takornariartitsinermik inuussutissarsiornermit mislittakkat allat assersuutigalugu tassaasinnaapput takornarissanik ineqartitsineq, attartorneqarluni takornarissanik immakkut angallasserit imaluunniit takornarissanik pisullini angalaarnernik aaqqissuussinerit.

Qinnuteqartoq takornariartitsinermi siusinnerusukkut sulisimappat pineqartup sukisaarsaatigalugu aalisartunik takornariartitsinermi pisinnaasaqarnissaa ilimagineqarsinnaavoq.

Nr. 4

Qinnuteqartup kommuni akuersissuteqarfiusumi takornariartitsinermik ingerlatsinera isiginiarneqassaaq.

§ 19-imut

Naliliisoqarpat qinnuteqartunik pisinnaasaqartoqanngitsoq akuersissuteqarnermik nalunaaruteqarnissamut Naalakkersuisut pisussaaffeqanngillat. Kuummut ataatsimut arlalinnulluunnit akuersissuteqarnissamik kingusinnerusukkut qinnuteqartitsinissaq Naalakkersuisut qinersinnaavaat.

§ 20-mut

Akuersissuteqartarnermik aaqqissuussinermi siunertaanngilaq, akuersissut inunnut ataasiakkaanut suliffeqarfinnulluunniit atajuartumik tunniunneqassasoq, taamaammallu piffissaq akuersissuteqarfiusoq ukiunik qulinik sivisussuseqassaaq. Ilimagineqarpoq akuersissummik piginnittup piffissamut sivisuumut takornariatitsinermi sullissinerup ineriartortitsinissaanut ukiut qulit naammattumik sivisussuseqartut.

Akuersissummik qinnuteqaqqinnermi piffissap akuersissuteqarfiusup kingullertigut ingerlasimanera nalilersorneqassaaq.

Akuersissummik pigisaqartup ataatsip ukiuni qulikkaani qanoq amerlatigisunik akuersissutininik pigisaqarnissaata killilerneqarnissaa eqqarsaatigineqanngilaq.

§ 21-mut

Inuussutissarsiutigalugu aalisarnertulli pisuussutininik atuisinnaatitaaneq inunnut/ suliffeqarfinnut amerlanerpaanut siaruarniarneqarpoq. Kalaallit Nunaanni takornariatitsinermi ingerlatsisut tassaagajupput suliffeqarfiit mikisut taakkulu angissusaat akuersissummut ataatsimut naleqquppoq.

Kisiannili suliamik ilisimasaqarnermik annertusaanermillu annertunerpaamik pilersitsiniarluni marluk tikillugit akuersissutininik pigisaqartoqarsinnaavoq.

Imm. 2-mut

Aalajangersagaq aktieselskabinut anpartsselskabinullu tunngavoq 50 %-illu aktianik anpartinillu piginneqataassutininut innersuussinerupput.

Imm. 3-mut

Aalajangersakkami tassani pingaartumik aktieselskabit anpartsselskabillu eqqarsaatigalugit oqaasertalersorneqarpoq. Piginneqataassutsit aalajangiisuusut inuussutissarsiutigalugu

aalisarnermi oqariartaatsip nassuiarneqarneratut paasineqassapput. Tassa amerlasuunik annikitsumik piginneqataassuseqartoqarpat assersuutigalugu suliffeqarfimmi piginneqataassutit tamarmiusut tamarmik 2 %-mik piginneqataassuseqartoqarpat ataasiinnarlu assersuutigalugu 35 %-inik piginneqataassuteqarluni, kingullertut taaneqartoq aalajangiisuusumik sunniuteqartutut isigineqassaaq.

Kapitali 6

Akiliineq

§ 22-mut

Pisussutit Kalaallit Nunaanni inuiaqatigiinnit tamarmiusunit aallaaviusumik pigineqartut inuiaqatigiit tunniussummatigit tassani inuiaqatigiinnut akiliisoqassaaq. Tassunga peqatigitillugu akuersissutinik tunniussineq Naalakkersuisunut kommuninullu allaffissornikkut piffissamik atuiffiuvoq.

Akiliisussaataitanerme sukisaarsaatigalugu aalisartumut ataatsimut ullormut ataatsimut naatsorneqartartumi akuersissutip aningaasatigit kaaviiartitsissutigineqalereernerani akuersissummik pigisaqartoq ukiumut ataasiarluni akiliisassaaq.

Sukisaarsaatigalugu aalisarlutik takornarissat amerlassusaat pillugu akuersissummik pigisaqartup eqqortunik paasissutissiinnissaa qulakkeerneqassaaq, taamaammallu akuersissummik pigisaqartoq ukiumi aalisarfiusinnaasumi kuummi ataatsimi ullormi ataatsimi aalisartut qanoq amerlatigineqarnerannik Naalakkersuisunut paasissutissiisussaataavoq, takuuk § 6. Akiligassat allattuiffimmi paasissutissiisutigineqartut tunngavigalugit naatsorsorneqassapput.

Imm. 3-mut

Oktobarip aallaqqaata imaluunniit decembarip aallaqqaataa arfininngorneruppat sapaat aappalluunniit ataasinngorneq tullittooq akiliiffissanngussaaq imaluunniit piffissaq akiliiffissaq kingusinnerpaajussalluni.

Kapitali 7

Akuersissutip atorunnaarnera tunniunneqarneralu

§ 23-mut

Akuersissummik tunniussinerme siunertaq tassaavoq taanna atorneqassasoq, taamaattoqanngippallu kuuk inuussutissarsiuutiginaq aalisarnermi nalinginnaasunngorteqqinneqartariaqarpoq. Aamma kuummik atuisinnaaneq neqeroorutigeqqinneqarsinnaavoq. Akuersissutip atorunnaarneranik aalajangiineq

paasissutissanik immersugaq nassiunneqartoq tunngavigalugu pissaaq.

Tamanna pillugu paasissutissat pisariaqartinneqarpata sukisaarsaatigalugu aalisarlutik takornarissat akiliutaat nalinginnaasoq pillugu Naalackersuisut akuersissummik pigisaqartumut paasissutissanik pissarsiniarsinnaapput.

§ 24-mut

Kuup eqqaa sukisaarsaatigalugu aalisarnermik piujuartussamik takussutissaarullugu sapinngisamik qimanneqassaaq.

Kisiannili illuaqqat allalluunniit taamaattut eqqarsaatigalugit nunaminertamik atuisinnaaneq pillugu malittarisassat ataaniipput, nunaminertamillu atuisinnaatitsineq pillugu malittarisassat innersuussutigineqarput.

§ 25-mut

Aalajangersagaq tassaavoq akiligassamik akiliisoqanngippat sumiginnaaneq pillugu Naalackersuisunut pisinnaatitsineq. Sumiginnaanerit annertuut allat pissutsit malillugit tassaasinnaapput § 6 malillugu ukiumi piffissami aalisarfiusinnaasumi sukisaarsaatigalugu aalisartut kuummik atuisimasut amerlassusaat pillugu paasissutissanik eqqortunik nassiussinnginneq. Akuersissummik pigisaqartup sumiiffiup eqqiluutsuutinnissaanik pisussaaffimminik annertuumik unioqqutitsippat sumiginnaaneq annertunerusoq aamma pisinnaavoq.

§ 26-mut

Akuersissutininik nalorninarsinnaasunik aningaasannanniarsinnaaneq pinngitsoorniarlugu aalajangersagaq ilanngunneqarpoq. Akuersissummik pigisaqartup akuersissut pissarsiani atorsinnaanngippagu piffissap akuersissuteqarfiusup sinnerani akuersissummik tunniussinissaq kissaatigippagu tamanna Naalackersuisunit akuerineqassaaq.

Tunniussisoqarpat piffissami akuersissuteqarfiusumi taamaallaat ukiunut sinneruttunut taanna atuutissaaq.

Tunniussinermik nalilersuinermi akuersissummik tunniussivissatut kissaatigineqartoq akuersissummik qinnuteqartut nutaat pineqartillugit tunngaviit assingi aallaavigalugit nalilersorneqassaaq.

Interessentselskabi pineqarpat soqutisaqartoq ataasiinnarluunniit taarserneqarpat tamanna

tunniussinertut isigineqassaaq.

Imm. 2-mut

Akuersissut suliffeqarfimmit pigineqarpat suliffeqarfimmi piginneqatigiissutit affaat sinnerlugit allanit pigineqalerpata piginnittut nikinnerattut isigineqassaaq.

Imm. 3-mut

Taasisinnaassutsit 50 %-iinig amerlanerusunik pigisaqarneq assersuutigalugu aktiaatillit isumaqatigiissutaat taassuminnga killilersuisoq atorlugu pissarsiarineqarsinnaavoq. Taasisinaassutsinik 50 %-it sinnerlugit pigisaqarneq aktianik anpartinilluunniit taasisinnaasusiisunik pigisaqarnikkut aamma tamanna pissarsiarineqarsinnaavoq, allallu aktiaataat anpartiutaalluunniit taasisinnaassutaasinnaanatik (aktiat a-t imaluunniit aktiat b-t).

Aktianik piginneqataassutsikkut aalajangiisuusunik tunniussisoqarpat imaluunniit taasisinnaatitaaneq aktianut atasoq allanngorpat taamalilluni suliffeqarfimmi aalajangiisuusumik sunnuteqartoqalerluni imaluunniit taamatut kinguneqartumik isumaqatigiissusiortoqarpat tunniussinertut isigineqassapput.

Imm. 4-mut

Suliffeqarfimm akuersissummik pigisaqartumi aktienik imaluunniit anpartinik tunnissinerit tamarmik nalunaarutigineqassapput. Interessentselskabini soqutigisaqartut taarserneqarpara aamma nalunaaruteqartoqassaaq.

Imm. 5-imut

Interessentselskabimi soqutigisaqartoq ataasiinnarluunniit taarserneqarpat suliffeqarfiup allanngorneratut isigineqassaaq, tamannalu pillugu nalunaarut Naalakkersuisunut nassiunneqassaaq.

Imm. 6-imut

Kingornussisuusinnaasup akuersissummik atuisinnaanera qulakkeerneqarsinnaanngimmat akuersissut kingornunneqarsinnaanngilaq.

Kapitali 8 *Pineqaatissiinerit*

§ 27-mut

Kisernaassineq pitsaasuussappat tamassuminnga unioqutitsineq pineqaatissiinermut attuumassuteqassaaq.

Pineqaatissiineq politiinit ingerlanneqassaaq, unioqutitsinerli piniarnermik nakkutilliisumit paasineqarsinnaavoq uparuarneqarlunilu. Kalaallit Nunaanni Aalisarsinnaanermik Akuersissutinik Nakkutilliivik aaqqissuussinermik nakkutilliisuvoq misissuisassallunilu.

Inunnik pineqaatissinneqarsinnaasunik allaaserinninneq § 2, imm. 1-ip aamma imm. 2-p kinguneranik pivoq.

§ 28-mut

Piffissap akuersissuteqarfiusup atorunnaarnerata kingorna kuuit akuersissuteqarfiusut eqqaanni iluarsaassereerluni kusarnatuutillugillu qimanneqarnissaasa qulakkeerneqarnissaanik aalajangersakkami siunertaavoq.

Iluarsaassineq akuersissummik pigisaqarsimasup akiligassaanik ingerlanneqartoq summiiffimmik nalinginnaasumik pilersitseqqinnissamut pisariaqartumut akornutaassanngilaq.